

Matapulelo

A

- AAmoni.** Yaali athu a nlogo na Aramayiku yamagile murudda wa omadhowelo wa nduwa wa mwihinje Zhordawu ayene yawanile koddo ni aHeberi, ahinoniwa mulugu eewa Moloki, naari wi Miloko. Moone Wambeela 19.38.
- Abibi.** Naali ndina na mweeri mu ewogelo ya eHeberi wambeela vakukuuve omagomelo wa mweeri wa Marusu ni omambeeelo wa mweeri wa Abirili, waaddamelaga mudhidhi woohadda dhilo.
- AKalideya.** Naali ndina navahiwe makuru majinji a Aramu yakumile omakumelo wa nduwa yahifiyedha omugonjiha Babilooniya olamulaga. Moone Wambeela 15.7; Meerelo a Arumiwi 7.4.
- AKanani.** Naali ndina na athu yamagile oKanani, ayene aHeberi yaafwanyiliwa efiyaga wewo, si epaddi emohi eyene osogolo wiwa yadhiile wiithaniwa ni ndina nowi Palextina. Moone Wambeela 12.6; Zhouzuwe 3.10.
- Akaya.** Yaali elabo yataganyihedheye ni epaddi ya omadhowelo wa nduwa wa oGeresiya. Nluwa nuulubale na Akaya naali Korintu. Maluwa mamohiya enaromoliwa mu Nipangano Nixa baala: Senkereya, Atena ni Nikopolisi. Moone Meerelo a Arumiwi 18.12,27; ARoma 15.26; AKorintu Owambeela 16.15; ATesalonika Owambeela 1.7-8.
- Alabasuturu.** Naali nibwe noozhazhaala na mooneyelo oweela nooligana ni marimore nnotopiwa osasanyaga mino, milinga, ni magaraafwa moohela makura oonukwela. Moone Matewuzhi 26.7; Maruku 14.3; Luka 7.37.
- Aleluya.** Madhu ala mu ewogelo ya eHeberi enatapulela wi “Mutamaaleni Nabwiya!” Moone Ovuhulela 19.1,3,4,6.
- Alifa ni Omega.** Mu maneetira a eGerego alifa naali neetira nowambeela, omega naali noogomihedha. Yesu voowoga wi

“Miyo gili Alifa ni Omega”, enatapulela: “Miyo gili wambeela ni ogomihedha”. Moone Ovuhulela 1.8; 21.6; 22.13.

Alowe. Yaali makura oonukwela owaadhola yasasanyiwa okumela wa muthanko winna ndina nenddo. Dhilemeelelo dha ologohiwa wa aZhudewu yoonyethiha guwo ni alowe ni mira dhahuruwedhiisuna miruthu dha athu. Moone Numero 24.6; Poroveribiyo 7.17; Zhuwawu 19.39.

Anamakoha-musoko. Moohariha mweeddelo wakumihiwe ni aRoma oPalestina, anamakoha-musoko yaali athu yathomeliwe wi esokelege musoko ni dhoolivela dha dhooguliha. Wona mwafwanyeyeliwa mabasa a othongi waali oRoma, mudhidhi wa Nipangano Nixa, amohi mwa aliwa, yoofwanya mpatha moohufwanelela wa mabasa eewa wi yawaake athu musoko okwaranya vafuneliisu oliva, yoohalana dhoweenjedhedhavo dhiwa okala dheewa, mowindo yoosugwiwa moonnyemuwa ni aZhudewu.

Anamakutha. Mu Nipangano Nawale namakutha di muthu mudhidhi wootamaala onahidda mabasa maatene mu nyuba yoweela akuthaga mukutho mu ndina na amuumohini aatene. Mudhidhi wa wale wi muthu akale namakutha yafuneya akale a epaddi ya nikuru noorumeedhiwa na emudhi ya nihimo na Leevi (Moone Levitiku) wa mabasa a nyuba ya Mulugu ya oZheruzalemi, anamakutha yaali oogawanyeya mwa makuru, kadda muthu mabasa aaye-aaye.

Aramu. Naali nlogo namagile vaari ni vaari va Siriya ni mwihinje Ewufarati; yaali amohive ni aHeberi. Mudhidhi wa Davidi ni Salomawu wahikala dhimwene dhijinjidhene dha Aramu oSiriya epaddi ya omakumelo wa nduwa wona munawogeliwiwa omwene winna nluwa nuulubale di Damasiku. AAramu yahifiyedha waagonjiha aBabilooniya, wewo oliisu odheela olamula wuulubale wa aBabilooniya teto ni aSiriyeene. Ewogelo yeewa yahilemeeleleya ni mmagulihelelo mwaatemwene, mudhidhi woolamula wuulubale wa Kingi a oPersiya. Moone Wambeela 25.20; Deteronomiyo 26.5; Samuweli a Nabili 8.5.

Areyopago. Yaali ethukuthuku ya oAtena vatugumanesa owiimelela a nluwa ndde, beeng'anela dhoomagamaga, dha masuuziho, a dhoweedbedha dheewa. Owiimelela ale yeethaniwa ni ndina na Areyopago naari ehithugumanile veethukuthukuni vale. Moone Meerelo a Arumiwi 17.19,22,34.

Asiriya. Elabo enafwanyeya omwaango wa oMesopotamiya maluwa aaye malubaleya yaali Axuuri, Kala ni Ninive. Mulogo weewa waali

mmohive ni aHeberi. Mudhidhi dhijinjidhene Asiriya yoowana ni mulogo wa Mulugu, vano mu yaaka ya mazana makumi matanu ni meenddi ni yaaka makumi meenddi ni yaaka emohi (721) Kirixtu ahinabaliwe, yahimugonjiha Samariya, nluwa nuulubale na aEzarayeli. Asiriya enowogiwa dila dhijinjidhene mmaniivuruni a anamavuhulela. Moone Wambeela 2.14; 2 Mamwene 15.19.

B

Babilooniya. Naali nluwa nuulubale na Mesopotamiya, murudda wa ndina nimohive nenddo, naali noofuneya vajinji mudhidhi olene. Babilooniya ahikala etoonyihedho ya mwiiddani avaanyihana ni Mulugu.

Bahala. Naali ndina na mulugu eebedhiwa ni athu a oKanani. Nnatapulela wi “nabwiya”, naari wi “mwiinya”. Bahala eelengeliwa okala nabwiya a dhoopaddusiwa ni mabasa ookaliha dha mmiddani, weebedhiwa waaye, ni dhooraruwa dheerwana mumburoni dhoweededha dha aKanani vowi yeera di mulugu onakalihawo dhoolima. Moone Numero 25.3; Zhuwize 2.11; Samuweli Owambeela 12.10; 2 Mamwene 10.18; ARoma 11.4.

Belezebu. Thi ndina nimohi na Sathana oli musogoleli a mineba dhootakala. Moone Matewuzhi 12.24. Ndina nddo nnadheela mwa Bahala-Zebube naali ndina na mulugu a aFilisti.

D

Ddimingu. Mbibiliyani madhu ala enatapulela nlabo nowambeela na samaana. Moone Matewuzhi 28.1; Maruku 16.2; Zhuwawu 20.1-19; Meerelo a Arumiwi 20.7; AKorintu Owambeela 16.2; Ovuhulela 1.10.

Ddiyabo. Thi ndina nimohi na Sathana.

Ddiyakoni. Madhu ala mu eGerego enatapulela “wiimelela”. Mu Nipangano Nixa enaagiwana aKirixtu amohi a mu gerezha, asogoleli owiimelela vamajelo, vmutugumanoni, naari wi owaakamihedha oorabula ni aredda. Muwari mwa mudhidhi mmohi, yahaakela mabasa mamohi oofuneya muwari mwa mutugumano. Moone AFiliposi 1.1; Timoteyo Owambeela 3.8.

E

Ebuwa. Waali mburo wasasanyiwa wathomeliwa wi vikuthiwege mikutho. Dhahikalawo misawo dhoohiyana-hiyana, dhimohi

dhoogeliwa mulu wa mabwe, dhimohi dhoomagiwa ni aliba orandda. Moone Wambeela 22.9; Okuma 20.24.

Egarigadhi. Moone *Gologotha*.

Epikurewu. Yaali anamasuuziwa a yosuuziha ya Epikuru, yavuwile oGeresiya ni oRoma. Epikuru aali namasuuziha mmohi asuuziha wi ohagalala si yego yuulubale mwiigumini. Namasuuziha Epikuru okwile mu yaaka mazana meenddi ni yaaka makumi matanu ni meenddi (270) Kirixtu ahinabaliwe. Murumiwi Pawulo ahivaanyihana oAtena ni nikuru na aEpikurewu. Moone Meerelo a Arumiwi 17.18.

Esitoyiko. Yaali masuuziho a namasuuziha Zenawu okwile mu yaaka mazana meenddi ni makumi matanu nammohi ni yaaka tanu (265) Kirixtu ahinabaliwe. Asuuziha wi ohagalala onakala ebaribareene mwa mukalelo woohuhiyaniheya, naari vaari va ohagalala naari vaari voohuhagalala. Murumiwi Pawulo ahivaanyihana oAntena ni nikuru a Esitoyiko. Moone Meerelo a Arumiwi 17.18.

F

Farawo. Madhu ala mu ewogelo ya aEgubuddu enatapulela “nyuba yuulubale”, eneemelela mburo mulubale wa olamula oyene odhiile okala ndina na mabasa, ninoniwena mamwene a wEgubuddu, mwa mukalelo wa mBibiliyani mamwene ayo eneethaniwana ndina nenddo. Ohiya ndo, amohi mwa aliwa enowiithaniwa mBibiliyani ni mandina eewa-eewa. Moone Wambeela 12.15; Okuma 1.11; AHeberi 11.24.

G

Gerezha. Moone *Mutugumano*.

Gologotha. Bu mwaango waaddamele oZheruzalemi wewo wakomeliwe Yesu Kirixtu. Moone, Matewuzhi 27.33; Maruku 15.22; Luka 23.33; Zhuwawu 19.17.

H

Heroddi. Yaali anamalamula annayi yalamula oPalestina yeethaniwa ni ndina nenddi.

Heroddi Agiripa 1. Aali namalamula a oPalestina ahabihiwe okuminadori yaaka ya 41 ofiyedha 44 Kirixtu agabaliwe aali mudhula a Heroddi Mulubale. Dalamulele wi murumiwi Yakobo apiwe teto ahilamula wi Peduru afugeliwe mukaambura. Moone Meerelo a Arumiwi 12.1,6.

Heroddi Agiripa 2. Oononeyesa vajinji ni ndina na Agiripa; aali mwaana a mudhula a Heroddi Mulubale. Moone Meerelo a Arumiwi 25.13; 26.2.

Heroddi Antipasi. Mwaana a Heroddi Mulubale aali kuminadori a oGalileya, wambeela yaaka ya 4 ofiyedha 39 Yesu agabaliwe. Oliye dalamulele dha opiwa wa Zhuwawu Namabathiza. Moone Matewuzhi 14.1-9; Maruku 6.14; Luka 3.1; Meerelo a Arumiwi 4.27.

Heroddi Mulubale. Aali mwene a oPalestina wambeela yaaka ya 37 ofiyedha yaaka ya 4 Kirixtu ahinabaliwe, di ole aapihile ahima oBetelemi Yesu Kirixtu vabaliwiiye. Moone Matewuzhi 2.1,3; Luka 1.5; Meerelo a Arumiwi 23.35.

Horebi. Thi ndina nimohi na Mwaango Sinayi. Moone Okuma 3.1; Deteronomiyo 1.6.

K

Kaxa ya nipangano no waandana. Yaali kaxa ya matabwa yooohuruwedhiwa ni oro mwalogoleliwa matabwa meenddi a mabwe valebiwe Malamulo kumi a Mulugu, ni dhego dhimohi dhasakuliwe ni Mulugu. Moone Okuma 25.10-22. Yathukuliwa veefuddi mookamihedhiwa ni dhimiri miinddi mmwenddoni minnaye dhaatedhene, vihinakale omwene wa aEzarayeli, kaxa ela saaveleela aliwa yadhowaga okoddoni, Davidi ahithukula odhowana oZheruzalemi, ovolosihwa ni Salomawu omburoni woweeselesa wa nyuba ya Mulugu yamagiliye. Yathukuliwe ni aBabilooniya, vagonjihiliwa nluwa na oZheruzalemi. Yokuneelanaya yahikalana mabasa malubale va elemelelo yoweeliha. Kaxa ela wa aEzarayeli yatapulela okala wa Mulugu vaari veewa.

Kederoni. Waali mukolopa oyene wavira vaari va Zheruzalemi ni Mwaango wa Olivera. Wakalana mahinje mudhidhi wa muzongwe baahi (naari wi mudhidhi wooddiddila). Mudhidhi weelimwe vinooneya waarave baahi. ABibiliya amohi waara wewo eneera waara Kederoni.

Kirixtu. Thi ndina nneethaniwana Mvulumusi Mulugu amuroromelihiye, avuwihwe ni anamavuhulela, mu ewogelo wa eGerego madhu owi “Kirixtu” enatapulela “Muthikitheliwi” (Misiya).

Kogwe ehinna omagomelo. Moone *Muliddi wooddiha*.

Kumi ni abiili. Enaagiwana ale Yesu yaasakuliliye okala anamasuuza aaye, naari wi arumiwi aaye. Moone Matewuzhi 8.21.

L

Libani. Dhaali dhego dhoonukwela dhapahiwa va mburoni va mikutho. Moone Okuma 30.7; Levitiku 2.1; Numero 4.16; Luka 1.9; AHeberi 9.4; Ovuhulela 5.8.

M

Mahala. Enatapulela waakela yego veebwenivene, naari waakela mareeliho ohulabele. Moone Luka 2.40; Meerelo a Arumiwi 18.27; ARoma 3.24; AKorintu Owambeela 1.4,7.

Makambuzi. Di muthu onaajiha aneenyama oofuwiwa. Moone AEfeso 4.11; Peduru Owambeela 2.25; Ovuhulela 7.17.

Makura oonukwela. Yaali makura athu yaadholiwa wi enukwelege pama, yakala vaari va athu amohi.

Malamulo. Waali mweeddelo wavahiwa aZhudewu wi eharihege. Kinatoonya dha malamulo kumi; tthabwa-tthabwa enatoonya dha malamulo mazana mannayi a eZhudewu Mulugu yamvahiliye Mozezi oMwaangoni Sinayi. Moone Okuma 12.24; Matewuzhi 5.17-18; ARoma 2.12-15; AGalasiya 2.16; AKolose 2.17.

Maleba Ootaleleya. Mu Nipangano Nixa ewogelo ela enatapulela ogumanihiwa wa maniivuru a madhu a Mulugu yarumeedhiwe ni aZhudewu, ayene nnawiriihu Nipangano Nawale.

Manaa. Yaali yooja yamora odhulu wi yaakamihedhege aEzarayeli egali mwiiddeddeneni. Moone Okuma 16.31; Numero 11.7; Zhuwawu 6.31,49; AHeberi 9.4.

Maredda. Mu ewogelo ya eGerego kinaagana mareddave, mbwenye teto dhiredda dhoohiyana-hiyana dha nikupa na muthu. Moone Levitiku 13.2; Deteronomiyo 24.8; Maruku 1.40; Luka 17.12.

Mburo wa anookwa. Onaagiwana omburoni wewo anookwa onakaliwa. Moone Luka 16.23; Meerelo a Arumiwi 2.27; Ovuhulela 1.18.

MFarizi. Aali a nikuru na mutugumano woovuwesesa muwari mwa mutugumano wa aHeberi. Yaali anamakutha, aliwa baakelela dhowaakamihedhana athu oorabula, basuuziha Malamulo. Moone Luka 5.17; Zhuwawu 1.24; Meerelo a Arumiwi 5.34; AFiliposi 3.5.

Mira. Yaali makura oonukwela yasasanyiwa okumela mmuthankoni. Yalabihiwa wona yoovaha teto yoowelihedha kopolo, yataganyihedha ni vinyu azhudewu teto yoolabiha voosasanyedhana muruthu ohunalogohiwe.

Misibe. Dhaali thalako dhokwiiva Yesu dhawogesiye dhakala dhoopadduwa dheereya mwa nlabo ni nlabo, naari mwa mudhidhi wi dhaakamihedhege wiiwelelamo ale yamvuruwana, aasuuzihaga wi yiwelelegemo dhego dhooviteya aliganihaga ni dhowooneya. Teto waali mukalelo walemeleliwe ni aHeberi yaafunaga otapulela Madhu Ootaleleya.

Mpogo. Mu Nipangano Nawale apogo a eHeberi yanna ereru yaali asogoleli a mirala dheewa ni makuru a emudhi yafiyedha okala nlogo, apogo a nluwa nimohive nookala nikuru noosogolela nluwa ni wiing'anela wogoowa. Apogo beeng'anela dhilemelelo. Mpogo enatapulela mabasa enakanniyena mwahaya buuyene vamohi yiiriwaga asogoleli ehili mwaha woobaliwa wale. Mu Nipangano Nawale muli misawo miraaru dha apogo. Asogoleli a nikuru na anya gerezha.

Muliddi wooddiha, Kogwe ehinna omagomelo. Mooligana ni masuuziho awale a aZhudewu naali nikungu nooddiha mwemo mineba dhootakala mwakaliwa dhoomagiwadhene ofiyedha othongiwa woogomihedha. Moone Ezekiyeli 31.14; Luka 8.31; ARoma 10.7; Ovuhulela 9.1,11.

Muneba wootakala. Di murumiwi a Sathana, naari wi mwiiddani a Mulugu. Moone Samuweli Owambeela 16.15; Matewuzhi 9.32.

Muneba Woweela, Muneba wa Nabwiya, Muneba wa Mulugu.

Yootapulelaya sookweyeene, ewogelo ya eHeberi enaligana ni muneba mu Nipangano Nawale enatapulela pevo, naari wi mwanamukathi a Mulugu, naari wi wooneyihiwa wa kopolo dha Mulugu. Muneba wa Mulugu si kopolo dhedho Mulugu dhinalabiyena, onakala ebaribareene vaari va aatene alene yaakelile mabasa a Mulugu, mooliganiha anamavuhulela. Mwa Muthikitheliwi Muneba wa Mulugu oli vowooneyavene. Anamavuhulela yahivuhulela yoovaha ya Muneba wa Mulugu wa athu aatene, va nlabo na okita Muneba Woweela wakitele mutugumano wowambeela wa arumiwi. Muneba onovaha nrromelo mwa Kirixtu.

Murima. Murima si epaddi ya vaari va emuthu, muneba waaye, nipara na tthottho dha muthu, munakuma dhowuubuwela dhapama, dhabure, dhoofuna. Moone Okuma 10.27; Deteronomiyo 11.18; Matewuzhi 5.8; Meerelo a Arumiwi 8.21.

Murumiwi. Nddi ndina na mabasa nnamutoonya muthu oorumiwa a Kirixtu. Mu Nipangano Nixa enawaagana athu kumi ni abiili Yesu yaasakuliye wi emveleelege agaasasanyedhe wi elaleyege mutheenga waaye. Ndina na mabasa nddi, nnolabihiwa teto wa

Pawulo (Moone AKorintu Owambeela 9.1; AGalasiya 1.1) ni wa aKirixtu amohi yeeroromelihe okalana omwiinya woomwadha nrromelo. Moone Meerelo a Arumiwi 14.14; ARoma 16.7.

Muselu Wapama. Ndhu nddi moolebiwa nnatapulela “Muselu wapama muxa”. Ndhu nddi navahiwe mu Nipangano Nixa mutheenga wa Yesu wanna nikuru na ebaribari na ofiya wa omwene wa Mulugu. Ndina nddi nahivahiwa wa maniivuru mannayi owambeela a Nipangano Nixa, enawoga dha egumi ni dha mutheenga wa Yesu, nda dhiireyile moorumeedheya mwa makalelo owambeela owoga wa Maruku. Moone Maruku 1.1.

Musogoleli a anamakutha. Nameeddiha a nikuru nuulubale na apogo aZhudewu onooneya wona musawo wa Yesu, ala vameentoni va Mulugu asogoleli a ale evulumusiwe, yaandaga waakamihedha oleveleliwa wa dhoothega dheewa. Moone Okuma 28.12,15,36; Zhuwawu 18.24; AHeberi 4.14; 5.10; 9.11-28.

Muthikitheliwi. Mu ewogelo ya aHeberi enatapulela “oosakuliwa ni Mulugu” wi elabe mabasa oorumiwa a musawo woofuneya. Nipangano Nawale nnowoga dha osakuliwa wa anamavuhulela amohiwa (1 Mamwene 19.16), wa anamakutha (Levitiku 4.3) wa mamwene (Samuweli Owambeela 10.1; 16.1-13). Ndina na mabasa nowi Muthikitheliwi nnathomeliwa mwene baahi, nitoonyihedhaga wi Mulugu dimusakulile vayeeka, ni mwaha ola madhu enatapulela Muthikitheliwi vamohi enatapulela “mwene”, “mwene oosakuliwa”, “oosakuliwa a Mulugu” ni oofwanafwanana. Mbwenye ndina na mabasa nowi Muthikitheliwi nnavahiwa mwene baahi wa namavulumusa alaleyiwe ni anamavuhulela a Nipangano Nawale. Moone Ezaya 9.6; Zheremiya 23.5. Ndina na mabasa nowaakuleleya nnalabihiwa vajinji mu Nipangano Nixa “Kirixtu”, nipaddusiwe odheela mwa ndhu nimohi na eGerego moofwanafwaniha nnatapulela “othikithela” wi naakulelane mwa ebaribari ni wiiweya wumohive wa ndina na mabasa mu ewogelo wa aHeberi. Moone Matewuzhi 16.15-20; Meerelo a Arumiwi 2.36. Ndina na “Kirixtu” vowambeela naali ndina na mabasa baahi noofwanafwaniha ni Muthikitheliwi vano nihidha vang'ono-vang'ono okala ndina nneenjhedha ndina na Yesu naari nilabihiwaga wona ndina naaye-naaye.

Mutugumano. Mu Nipangano Nawale madhu ala yatapulela aEzarayeli yeethaniwa mu ndina na Mulugu va dhowiireya dhoweededha. Teto aZhudewu mudhidhi waaliisu mwiiddeddereni, mudhidhi wa mamwene, teto egawelilewo omacedhiwelo. Mu Nipangano Nixa

nnapulela “gerezha”, naari wi “mutugumano”. Mu dhiwogelo dhaatedhene eHeberi naari eGerego dhinatapulela yego emohive, mutugumano. Moone Meerelo a Arumiwi 7.38; AHeberi 2.12.

MuZeloti. Aali muthu a nikuru na mutugumano mmohi wa aZhudewu a oZheruzalemi. Nikuru nddi nahikalana yoofuna emohi, wiinyuwela othongi wa aRoma. Moone Maruku 3.18; Luka 6.15; Meerelo a Arumiwi 1.13.

Mwaana a Davidi. Enamwaagana Yesu. Moone Matewuzhi 20.30; Maruku 12.35; Luka 1.27; Zhuwawu 7.42.

Mwaana a Muthu. Mu ewogelo ola onatapulela moogwaddela “muthu”. Yesu oolabiha mu ewogelo ola wi eeromole oliyeneene oonihaga wi wiire osakuliwa ni Mulugu wi akale Namavulumusa. Moone Maruku 10.45.

Mwanddeya wa Nowe. Waali mwanddeya wasasanyiwe ni Nowe, oyene wamvulumusile Nowe ni a vaade vaaye, ni aneenyama mudhidhi wa mahinje a mutokora. Moone Wambeela 6.8 ofiyedha 9.18; Matewuzhi 24.38; AHeberi 11.7; Peduru Owambeela 3.20.

Mwiiddani a Kirixtu. Kirixtu ahinadhe, mwiiddani a Kirixtu ni Mulugu, duuyene onaadhe, odha wa nabiiili wa Kirixtu ohuneereye. Madhu ala mu ewogelo ya eGerego enatapulela ole onapokihana ni Kirixtu. Moone Zhuwawu Owambeela 2.18,22; 4.1,3; Zhuwawu a Nabiiili 1.7.

N

Naarudu. Muthanko wa manddela oonukwela onasasanyiwa dhoonukwela dhoofuneyesesa dhookwima. Moone Maruku 14.3; Zhuwawu 12.3.

Namaakihedha. Naari wi: Muneba Woweela. Moone Zhuwawu 14.16-17; 15.25; 16.7.

Namasuuzza. Di muthu mmohi onamuhara namasuuziha aaye wi mwa oliye aakele masuuziho. Mu Nipangano Nixa ndhu nowi “namasuuziha”, mohaang'anyedheya onaagiwana Yesu. Mwa ela oomuhara Yesu yeethaniwa “anamasuuzza aaye”. Vowambeela arumiwi kumi ni abiili yeethaniwa anamasuuzza. Moone Matewuzhi 5.1; Maruku 4.34; Luka 22.24; Zhuwawu 21.1-2.

Namasuuziha a Malamulo. Athu oononesesa Malamulo a Mozezi. Mbwenye kinatoonya dha malamulo kumi baahi; tthabwa-tthabwa enatoonya dha malamulo mazana mannayi a eZhudewu Mulugu yamvahiliye Mozezi oMwaangoni Sinayi. Anamasuuziha

a Malamulo yaakamihedha otapulela Malamulo wa nlogo. Teto yowaaddeliha nlogo mwa dhaatedhene dhawogiiwa mwaha wa weebedha wa aZhudewu ohiya ndo mukalelo wa dhoolemeelela. Teto yookala epaddi ya omuthegoni wa aZhudewu. Evaanyihanaga ni Yesu mwaha wa dhosuuziha dhaaye, yooligana muumohini ni aFarizi.

Namavuhulela. MBibiliyani namavuhulela oli wona namafiyihedha a Mulugu, onaaddeliha nlogo olamula wa Mulugu, dhowaaddeliha dhaaye, ni dhoororomeliha dhaaye, mwa mukalelo wa dhoopadduwa dha mudhidhi olene. Yooniha dha musogolo mbwenye teto epaddi yuulubale yoowoga dha moobuwelelo a othongi wa Mulugu ni athu aaye. Sowi mwa mudhidhi wa wale, yavuhulela naari wi: “anamavuhulela” enatoonyihedha ofwanafwaniha mukalelo woohiyaniheya muumohini, onooneyiheya mwa kopolo dha odhulu dhinafwanyeya dhigali mwa namavuhulela, naari mwa nikuru na anamavuhulela. Moone, Samuweli Owambeela 10.5-12. Muwogelo wa eHeberi ohiya ndhu noothabwesesa owogiwa nneethaniwana namavuhulela, enofwanyeya mamohiya ehinawogiwa vajinji, mooliganiha: “Muthu a Mulugu”. Mutheenga dha anamavuhulela amohi dhihilogoleliwa mmaniivuruni a Bibiliya muli mandina a anamavuhulela ayene. Moone Ezaya, Zheremiya, Ezekiyeli, ni amohiwa. Miselu dhimohi, mwa dhaatedhene maniivuru a Bibiliya awale mu ewogelo ya eHeberi enawiithaniwa “Anamavuhulela awale”, eli maniivuru a thalako. Teto mBibiliyani enowogiwa anamavuhulela yafuna ovuhulela dha Mulugu moonyengetha ehiire wiithaniwa ebaribareene ni Mulugu.

Nambure. Thi ndina nimohi na Sathana, musogoleli a mineba dhootakala.

Nddoora. Mooligana ni eleemelelo yawale ya aZhudewu, ohela nddoora vamuru yaali etoonyihedho ya okweliwa, naari etoonyihedho yoothwaruwa, yahela nddoora vamuru ni owara guwo dha okweliwa. Guwo nda dhasasanyiwa ni guwo dha arabuli musawo wooriba. Moone Samuweli a Nabiili 13.19; Extere 4.3; Zhubu 42.6; Matewuzhi 11.21; Luka 10.13.

Nikuru nuulubale na apogo a aZhudewu. Nikuru nddi nathonga miladdu dhoothabwesesa dha aZhudewu. Yoolabiha othongi, ni olabiha vaari va aZhudewu. Onamalaga wa muthego mulubale wa aZhudewu waali wa anamarumeedha makumi matanu nameenddi, omwihiya perezidenti aali musogoleli a anamakutha akala

vamabasani. Oliye owiira epaddi ya onamalaga ola, wa asogoleli a anamakutha, apogo a mutugumano ni anamasuuziha a nlamulo.

Nipangano no waandana. Mulugu onafuna waandana ni mulogo waatene opaddusiliye. Ahisasanya nipangano no waandana ni Nowe, Abaramu, aEzarayeli ni Davidi. Vano ahisasanya nipangano no waandana Nixa ni aatene ale yamurumeedhile Yesu Kirixtu. Moone Wambeela 9.9-17; 15.1-18; Okuma 24.1-8; Samuweli a Nabiili 23.5; Maruku 14.24; Luka 22.20; 1 AKorintu 11.25.

Nlabo na Nabwiya. Anamavuhulela enolaleya dha nlabo na Nabwiya thi nlabo Nabwiya vinadhiiye waathonga kuluwi aEzarayeli ni malogo maatene. Nipangano Nixa nnooniha nlabo nddo wona nlabo noogonjiha kuluwi, mbwenye nnawoga dha odha woothithimiheya wa Yesu Kirixtu. Nlabo nddo nnojehiwiha wona nlabo Mulugu nneeriye awoonihe goyi athu ohuroromela.

Nlabo na othongi. Mulugu vinaathongigiiye athu a elabo ya vati odheela mwa Mwanaaye Yesu Kirixtu. Moone Matewuzhi 7.22; Peduru a Nabiili 2.9; Zhuwawu Owambeela 4.17.

Nluwa na Davidi. Naali ndina nimohi neethaniwana Zheruzalemi. Yahivaha ndina ndda mwaha wi Davidi ahiwana ni aZhebusewu, waagonjiha vano okala nluwa nuulubale na Ezarayeli. Mu Nipangano Nixa “nluwa na Davidi” onaagiwana Betelemi owaniwa Davidi. Moone Samuweli a Nabiili 5.7-9; Koronika Owambeela 11.7; Luka 2.11.

Nyuba ya matugumano ya aZhudewu. Nyuba nda dhinafwanyeya nluwa thi nluwa ni mmuruddani, mwemo aZhudewu mwatugumaniwa yeelengaga Maleba Ootaleleya, emweebedhaga Mulugu. Mwemo kamwakuthiwa mikutho, mbwenye mu nyuba ya Mulugu ya oZheruzalemi mookuthiwa mikutho. Vaari va sumaana nyuba ya matugumano yoolabiha wona sikoola yowasuuzihamo ahima teto yootugumanamo yiiwananelaga dha mabasa mamohi. Nyuba dha matugumano dhimohi dhowambeela dhapadduwile mudhidhi wowiigariwa oBabilooniya. Madhu owi “nyuba ya matugumano” vowambeela yatapulela “nikuru, na mutugumano”. Yesu ni arumiwi aaye yoodhowesa nyuba dha matugumano yoofwanya mpatha woolaleya Muselu Wapama wa Mulugu.

Nyuba ya Mulugu. Madhu ala yahikalana dhooharihedha dhimohi enaagiwana nyuba ya oZheruzalemi mwemo aZhudewu mwamweebedhiisu Mulugu. Teto naali niburo narumeedhihiwe wi ekuthegevo mikutho. Salomawu amagile nyuba ya Mulugu, vaari ni vaari va yaaka mazana matanu ni mannayi (900) Yesu ahinabaliwe. ABabilooniya yahibwanyula va yaaka

ya 587-586 Yesu ahinabaliwe. ABabilooniya yahaacedha aEzarayeli ajinji waadhowana oBabiloniya. Nuwindo voovira yaaka vang'ono aEzarayeli amohiwa yahiwelela wEzarayeli wambeela omaga dila biili nyuba ya Mulugu mbwenye yamagile ni mukalelo woopureya. Dhigavirile yaaka dhijinji mwene Heroddi Mulubale ahibwanyulavo nyuba ya Mulugu omagavo yuulubale yapamesesa. Oliye amarihile omaga va yaaka tanu ni nnayi Yesu ahinabaliwe. ARoma yahibwanyula nyuba ya Mulugu ele yaaka ya makumi matanu nameenddi (70) Yesu agabaliwe.

O

Omidhela. Yaali elemeelelo yoweelihiwa yeeriwana ni mwazi, ni makura naari ni mahinje. Yaafunaga omidhela yamidhela ni hisope, yaamidhela oororomela mudhidhi wa mathanga amohi.

Opama, owoma murima. Wawiirela dhapama athu amohi, naari wi waadhivela amohiwa.

Othwaruwa. Mu Nipangano Nawale ndhu nddi mu eHeberi nnapulela “owelela wa Mulugu”. Mu Nipangano Nixa nnapulela ocenja mweeddelo, naari wi mukalelo onakaliwe, mwaha wi athu aatene yahithega, enajejha othongiwa ni Mulugu. Othwaruwa wu sili dilaya yoovulumusiwana. Moone Matewuzhi 4.17; Maruku 1.4,5; Luka 3.3.

P

Paxkwa. Yaali mathanga oothabela wa Ezarayeli yuubuwelelaga wooboliwa muudhaarini wa makolo eewa wEgubuddu. Moone Okuma 12.1-20; Maruku 14.12. Mu ewogelo ya aHeberi ndina na mathanga ala nneethaniwa Pesaxi. Mathanga a Mikaathe Dhoojuhela Emela waali weenjehedha wa Paxkwa. Moone Deteronomiyo 16.1-8; Matewuzhi 26.2,17; Maruku 14.1,12; Meerelo a Arumiwi 12.3-4; AKorintu Owambeela 5.7.

Pentekoxte. Thi nlabo nnoobuweleliiwa okitela wa Muneba Woweela wa arumiwi.

Pethe. Pethe yaali etonyihedho dhootopiwa mabasaya yaali okarimbarina dhego dhoohiyana-hiyana wona makaarata naari masugwamento. Dila dhijinji yalabiha ni ebuno, dila emohi yookapathiha mukohi ni mugufu. Moone Wambeela 38.18.

R

Rabi. Di muthu onaasuziha athu amohi wi yiirihedhege dhinafuniye wi athu ayo ehadhihelege.

S

Saduseyi. Naali nikuru ning'onong'ono na vowihivale na aZhudewu, nanna mukalelo woororomela woohiyana ni afarizi mbwenye anamathonga a guveruno yowawiiwelela vajinji. Anamarumeedhela a asaduseyi yaali oovuwa wona anmakutha ni apogo a oZheruzalemi. Aliwa yarumeedha maniivuru matanu owambeela a Nipangano Nawale wona ooreelihiwa, kayawiiwelela apogo awale dheejedhedhiisu mmalamuloni. Kayarumeedha dha ovenya muukwani naari kayarumeedha dha angero. Teto mwa nda yaali oohiyana ni afarizi, mbwenye dhigalive ndo yahitugumana omwiinyuwela Yesu. Moone Matewuzhi 3.7; Maruku 12.18; Luka 20.27; Meerelo a Arumiwi 4.1.

Sathana. Musogoleli a mineba dhootakala teto ononiwe ni ndina nowi: Bezebu, Ddiyabo ni Nambure. Mu Nipangano Nixa onaagiwana mwiiddani oothabwesesa a Mulugu. Teto ohunoniwa ni mandina mamohi owi oliye di nameeha, namanyengetha, namasumela mulogo.

Sezari. Naali ndina na namathonga mulubale a mwiilaboni. Mu Omwene wa oRoma, namathonga akopolo avahiwa ndina na mabasa, Sezari. Mu Nipangano Nixa ndhu nowi Namathonga akopolo enamwaagana mmohi wa aSezari yahaba vampanddoni va othongi oyo.

W

Wiineliwa, ogwaddiwa. Yaali elemelelo ya mutugumano wa aZhudewu ni malogo mamohi awale, yagwadda osogolo wa enana ya mwaana a mulobwana, wa athu a nlogo na aEzarayeli, wahikalana otapulela wuulubale va nipangano no waandana ni Mulugu. Moone Wambeela 17.9-14; Levitiku 12.3; Luka 1.59; Meerelo a Arumiwi 7.8; ARoma 2.25.

Z

Zhentiya Naali ndina aZhudewu nawiithaniiwana ale yahaali aZhudewu: athu a malogo mamohi.

Ziyoni. Nnatoonya mburo oyene vamagiwe Nyuba ya Mulugu. Moone Samuweli a Nabiili 5.7; 1 Koronika 11.5; Masaalimu 48.3. Mu Nipangano Nixa Ziyoni nnatoonya vaade va Mulugu, naari wi Zheruzalemi Muxa. Moone Matewuzhi 21.5; AHeberi 12.22; Peduru Owambeela 2.6; Ovuhulela 14.1.